



24. juli 2019

Inatsisartut Suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit:

- 1. Namminersorlutik Oqartussanit pigineqartut ingerlatseqatigiiffiit qassit pillugit Naalakkersuisut piginnittuuneq pillugu pilersaarusiornikuuppat? Piginnittuuneq pillugu pilersaarusiortoqarsimappat ingerlatseqatigiiffik ataaseq arlallilluunniit pillugit taava taakku akissummut ilanngussatut ilannguteqquneqarput.**
- 2. Suna pissutaava ingerlatseqatigiiffiit ilaat eqqarsaatigalugit piginnittuuneq pillugu pilersaarusiortoqarsimannnginneranut? Naalakkersuisut qinnuigineqarput ingerlatseqatigiiffiit ataasiakkaat pilugit tunngavilersuuteqaqqullugit.**
- 3. Naalakkersuisut qaqugu naatsorsuutigaat ingerlatseqatigiiffiit tamaasa pillugit piginnittuunermut pilersaarutitik sanasoqarsimassasoq? Tassunga atatillugu Naalakkersuisut qinnuigineqarpuq akissutitik tunngavilersoqqullugit ingerlatseqatigiiffiit ataasiakkaat pillugit piginnittutut pilersaarusiorterit qanoq tullerriaarneqassamaarnersut?**
- 4. Suliamut tunngasunik allanik soqutiginaatilinnik Naalakkersuisut paasissutissiisinnaanerlutik?**
(Inatsisartunut ilaasortaq Malene Vahl Rasmussen, Demokraatit)

Begrundelse

Demokraatinut pingaaruteqarpoq Namminersorlutik Oqartussat namminersorlutik oqartussat pigisaasa ingerlatseqatigiiffiit ulluinnarni ingerlanneqarnerannut akuliuttannginnissaat. Aammali pingaaruteqarpoq Namminersorlutik Oqartussat piginnittutut pilersaaruteqarnissaat aamma/imaluunniit siumut isigaluni siulersuinissamut pilersaaruteqarnissaat ingerlatseqatigiiffinnut ataasiakkaanut, taakku inuiaqatigiinnut sapinngisamik annerpaamik iluaqusiisinnaaqqullugit.

Naalakkersuisut ukiut tamaasa Namminersorlutik Oqartussat ingerlatseqatigiiffiutaat pillugit Inatsisartunut nassuiaammik saqqummiussisarput. 2017-mut nassuiaammi qulequttami " Pimoorussilluni piginnittuuneq"-mi ima allassimasut atuarneqarsinnaapput:

" Taamaattumik piginnittuuneq pillugu politikimik tamakkiisumik Naalakkersuisut ammasumik pullaveqarnissaannik pisariaqartitsisoqarpoq, ingerlataqarfimmi pilersaarutaasinnaasunut naapertuuttumik. Siunertaq tassaavoq ingerlatseqatigiiffinnut tamanut piginnittuunermi periusissaliortoqassasoq, siullermilli taakku ingerlatseqatigiiffinnut Naalakkersuisut suliniuteqarfiinut allanut annertuumik qaleriiffiusunut suliarineqassallutik. Siullertut ingerlatseqatigiiffiit annerit Namminersorlutik Oqartussanit pigineqartut sisamat pineqarput, tassa KNI, Royal Greenland, Tele



Greenland aamma Royal Arctic Line.”¹

2018-mut nassuiaammi qulequttami tassani uku atuarneqarsinnaapput:

” Taamaattumik Naalakkersuisut piginnittuunermut politikkimi tamarmiusumi, tamakkiisumik isiginninnissaat pisariaqartinneqarpoq, taamaalilluni taanna suliassaqaarfinnut pilersaarutaasimasinnaasunut naapertuutissalluni. Siunertaavoq suliassaqaarfinnut Naalakkersuisoqaarfinnit ataasiakkaanit ingerlatseqatigiiffinnut ataasiakkaanut pilersaarummik suliaqartoqassasoq, tassani aallaqqaammut ingerlatseqatigiiffinnut Naalakkersuisut allatigut suliniutaannut annertuumik attuumassuteqartunik suliaqartunut, taakkua suliarineqassallutik. Tassani siullermik pingaarnertullu ingerlatseqatigiiffiit Namminersorlutik Oqartussanit pigineqartut angisuut sisamat KNI, Royal Greenland, Tele Greenland aamma Royal Arctic Line pineqarput..”²

Oqaaseqatigiit assigiinngissutituaraat 2017-mi eqqartorneqarmat piginnittuuneq pillugu pilersaarutit kiisalu 2018 pineqarlutik pilersaarutit. Oqaaseqatigiilli suulluunniit atorneqaraluarpataluunniit uanga isumaga naapertorlugu eqqartorneqartoq ataasiuvoq, tassalu pingaaruteqartoq ingerlatseqatigiiffimmut piginnittut pilersaaruteqarnissaq/ siumut isigaluni siulersuinissaq ingerlatseqatigiiffiup sumut ingerlanissaa pillugu.

Tamanna tunngavigalugu soqutigintutut isigaara tusassallugu, suliame tassani sumut killittoqarsimanersoq.

Qinnutigaara ullut piffissarititaasut ullut sulliviit qulit iluanni apeqqutikka akineqassasut.

¹ Namminersorlutik Oqartussat ingerlatseqatigiiffiutaat - Inatsisartunut ukiumoortumik nassuiaat 2017

² Namminersorlutik Oqartussat ingerlatseqatigiiffiutaat - Inatsisartunut ukiumoortumik nassuiaat 2018